


ALAHADY FAHA 22 MANDAVANTAONA A 2023



NY FAHASAMBARANA NO TAMBIN'NY FIJALIANA

Ry Kristianina havana, raha tamin'ny Alahady lasa faha-21 mandavantaona no ao anatin'ny vanim-potoana andalinantsika ny finoana isika ka hahatonga antsika ho Kristy mpiara-belona eo anivon'izao tontolo izao sy eo anivon'ny mpiara-belona dia mbola mitohy izany amin'izao

Alahady faha-22 mandavantaona izao. Tsy mandeha ho azy ny fijoroana manambara ny finoana, izay maha Kristy mpiara-belona satria raha nitondra ny famonjena i Kristy dia tsy arak'izao endrik'izao tontolo izao ny famonjena entiny eo anivontsika mba hahatonga antsika koa handray an'izany famonjena izany ka hahatonga ny hafa

hahay handray ny famonjena. Nidina farany ambany Izy araky ny voalazan'i Md Paoly amin'ny taratasiny ho an'ny Filipianina, na dia nanana ny toetra maha-Andriamanitra azy izy dia nataony tsinontsinona izany fa nietry ho farany ambany izy. Koa noho izany ny fahefana eo amin'ny eglizy dia tsy fahefana mamoritra fa fahefana to-teny ho entina manompo ka mety miseho ary azo lazaina fa tsy arak'izao tontolo izao ny hasambarana sy ny fiadanana ampianaran'i Kristy, tsy hoe kobaka am-bava no nataony fa ny fiainany mihintsy no maneho an'izany làlana mankany amin'ny hasambarana izany.

Ry Kristianina havana, aza gaga isika fa mety misy sedra, misy fijaliana, tsy izay anefa ny tanjona, tsy izany no tadiavina fa izany no làlam-pamonjena mitondra amin'ny hasambarana,

Vakiteny I : Jer. 20, 7-9
Tononkira : Salamo 62
Vakiteny II : Rôm. 12, 1-2
Evanjely : Mt. 16, 21-27

ny azo amintinana ny lohahevitra amin'izao Alahady faha-22 mandavantaona izao dia ny hoe "fahasambarana ny tambin'ny fijaliana". Tsapantsika izany ao amin'ny vakiteny voalohany. I Jeremia Mpaminany nahatsapa ny fahasarotan'ny fitoriana ny Vaovao mahafaly, ny fanambarana ny sitrak'Andriamanitra amin'ny maha mpaminany azy satria araka ny fanazavana nataontsika matetika ny mpaminany dia manambara ny sitrak'Andriamanitra fa tsy hoe manambara ny ho avy. Ny ho avy ambarany dia ny sitrak'Andriamanitra.

"Notarihinao aho, ry Tompo, ka voatarika" Jer20, 7. Fitarainana lavabe no nataon'i Jeremia mpaminany eto ka mety ho fitarainantsika koa raha mijoro ho vavolombelona isika manambara ny sitrak'Andriamanitra, raha Kristy mpiara-belona amin'olona tokoa isika dia aza gaga fa mety misy zavatra niainan'i Jeremia ka miseho amin'ny fiainantsika ihany ka mahatonga antsika mitaraina amin'ny Tompo : *"Nosamborinao aho, ka nahery lanao. Zavatra fihomehezana aho isan'andro; maneso ahy avokoa ny olona rehetra". Fa isaky ny miteny aho, dia manao antso avo, manambara loza sy fandringanana, ka ny tenin'ny Tompo tonga fandatsana sy fihomehezana ahy isan'andro. Hoy aho: "Tsy hilaza ny aminy intsony aho, tsy hiteny amin'ny Anarany intsony aho!..." dia nisy toy ny afo nirehitra ato am-poko, voahidy ao anatin'ny taolako; nanao izay hihazonana azy aho, nefa tsy nahatana azy".Jer 20 (8-9)*

Misy fotoana tena mangidy dia mangidy eo amin'ny fijoroana ny maha-Kristianina katolika. Aoka tsy ho menatra ny finoana tahaka ny nataon'i Jeremia isika fa raha ao amintsika tokoa ilay afom-pitiavana tahaka an'i Jesoa dia mahafoy koa isika. Mirehidrehitra mandrakariva ny fo. Izany no azo amintinana ny "dialogue" ambaran'i Jesoa amin'ny Evanjely, nanambaran'i Jesoa tsy mihambahamba tamin'ireo mpianatra izay nanafintohina an'i Piera aza, nolazain'i Jesoa mazava fa ny finoana tsy tany malemy anorenan-pangady, voalazantsika matetika io fa tany lonaka hanovozana fahasoavana. Izany indrindra no azo andraisana ny resaka nifanaovan'i Jesoa sy i Piera Tsy neken'i Piera ny hijalian'i Kristy, satria Kristy mahery, manampatra sy mampiseho ny heriny, tsy manaiky ho resena no noheveriny. Nihodina Jesoa ka nilaza taminy hoe: Mialà amiko ry Satana! Manafintohina ahy ity ianao, satria tsy mihevitra araka ny hevitr'Andriamanitra, fa araka ny an'ny olona. Kristy noeritreretina sy nandrasan'i Piera dia tsy i Kristy araka an'Andriamanitra fa araka ny olona ihany. Ny fijaliana sy ny fahafatesan'i Kristy anefa dia tafiditra tao amin'ny fandaharan'Andriamanitra, eny fa na dia teo aza ny nanoloran'ny loholona sy ny mpanora-dalana ary ny mpitondra hafa rehetra Azy.

Tohizan'i Jesoa ny fampianarany. Milaza mazava indray Izy fa raha misy te-hanaraka azy dia aoka izy handà ny tenany, midika izany fa mahafoy ny tena sarobidy, mahafoy ny aina ary izany ny tena farantampony satria mamy ny aina.

Midika koa fa tsy maintsy misy safidy mazava tsara atao raha te-hanaraka an'i Jesoa satria izany no hahafahantsika miroso amin'ny lalindalina kokoa.

Taitra i Piera raha naheno ny tenin'i Jesoa fa tsy maintsy manolo-tena izy àry amin'ny alalan'ny hazo fijaliana izay mitondra amin'ny fitsanganan-ko velona sy hasambarana ary izay koa no tsy

maintsy iainan'izay te-hanaradia an'i Jesoa ka ho Kristy mpiara-belona amin'olona. Izy ilay nanambara ny finoany ka nilaza fa i Jesoa no Kristy zanak'Andriamanitra velona no nilaza ihany koa hoe : "sanatria Tompo raha hihatra Aminao izany", satria tsy masom-pinoana no nijereny an'izany rehetra izany, eo ny maha-olona an'i Piera satria mety nirehareha na nipoerapoera izy nilaza fa izaho no tena izy, sahy nijoro izy namaly ny an'i Jesoa. Nampanginin'i Jesoa anefa izy amin'izany fomba fijerin'izao tontolo izao izany ka nolazany hoe "*Mialà amiko, ry Satana! Manafintohina Ahy ity ianao, satria tsy mihevitra araka ny hevitr'Andriamanitra, fa araka ny an'ny olona*".

Tsy ny fijerin'izao tontolo izao no làlam-pamonjena fa ny làlan'ny fahafoizana ka arakaraky ny ahafoizanao no handraisanao ny fahasoavana bebe kokoa ao amin'Andriamanitra, tsy hoe mamono tena sanatria fa manolo-tena ho an'Andriamanitra, manao ny asan'Andriamanitra izany hoe tsy ny asa arak'izao tontolo izao no kendrena fa araky ny sitrak'Andriamanitra. Io no ambaran'i Jeremia mpaminany.

Raha manao ny asan'Andriamanitra araky ny sitrak'Andriamanitra isika dia Izy no hanao ny asantsika, izany ny dikany hoe "*Raha misy te hanaraka Ahy, aoka izy handà ny tenany sy hitondra ny hazofijaliany, ka hanaraka Ahy.*" Izany hoe ny fiainan'i Jesoa no tsy maintsy ho fiainantsika, ny làlam-piainan'i Jesoa no tsy maintsy ho làlantsika ka hahatonga antsika ho Kristy eo amin'ireo manodidina antsika.

Araky ny voalazan'i Jesoa io "*Inona no soa azon'ny olona raha mahazo izao tontolo izao izy, nefa very ny fanahiny?*"

Raha te hahazo ny fiadanana sy hasambarana isika dia tsy maintsy mahafofy, izany no atao hoe Eglizy manompo, aoka mba hiala amin'ny Eglizy mandray fotsiny isika fa ho tonga koa amin'ny Eglizy mahafofy sady Eglizy mandray an-tànana , mandray ny fahasoavan'Andriamanitra, ny finoana, ny sakramenta, aoka ho Eglizy mahafofy ny aintsika, mahafofy ny harenantsika, mahafofy ny taletantsika, ary izay ny dikan'ny hoe fanompoana : Eglizy manompo. Izany no ezaka ataontsika amin'izao Sinaody izao ka hahatonga antsika ho EGLIZY OLO VELOMIN'NY BATEMY MIOMBONA MANDRAY AN-TANANA IRAHINA HO MISIONERA.

Mananatra antsika i Md Paoly tahaka ny nataony tamin'ireo Romanina satria tsy resabe ny fiovam-penitra mahery vaika fa miseho amin'ny fiainana andavandro. Hoy indrindra I Paoly noho ny famindram-pon'Andriamanitra, aoka samy hanolotra ny tenany amin'Izy Tompo, ho sorona velona, masina, ankasitrahiny ; ary mba tsy hanaraka an'izao tontolo izao fa hiova amin'ny fanavaozan'ny Fanahy, mba ahafantarany ny sitrapon'Andriamanitra, izay sady soa sy ankasitrahiny no lavorary. Miantefa amintsika izany fankaherezana sy fampirisihana izany. Manentana antsika i Md Paoly androany mba hanolorantsika ny tenantsika sy ny fiainantsika manontolo ho sorona velona, masina, ankasitrahin'ny Tompo. Vokatr'izany indrindra dia entanin'ny mpanoratra koa isika mba tsy hanaraka be fahatany an'izao tontolo izao, arak'ilay hoe: olona eo amin'izao tontolo izao isika fa tsy olon'izao tontolo izao. Toy izany ihany koa

noho ny fanavaozan'ny Fanahy dia mba hahafantatra sy hanatanteraka hatrany ny sitrapon'Andriamanitra.

Ry Jesoa Tompo ô, ianao dia nanaiky hahafoy ny maha zanak'Andriamanitra Anao ary indrindra nanaiky ho faty hamonjena anay, enga anie mba ho vonona hahafoy hanara-dia Anao koa izahay ka hitondra ny hazo fijaliana eo amin'ny làlam-pamonjena ho anay izay hitondra anay amin'ny tena hasambarana marina. Ianao tokoa no loha laharana eo amin'ny fiainanay, ianao no priorité, amin'ny alalanao sy miaraka Aminao no iainanay ny fiainanay manontolo, aoka ianao no ho loha laharana amin'ny ataonay rehetra ka raha manatanteraka ny sitrak'Andriamanitra izahay, raha manao ny asan'Andriamanitra dia Andriamanitra tokoa no hanao ny asanay ka na dia mety misy mangidy sy fijaliana aza dia hitondra anay amin'izay tena hasambarana sy fiadanana izany. Masina Maria Reny, modely ho anay ianao amin'ny fanatanterahana sy amin'ny fahafoizana ka mivavahà ho anay zanakao mba ho vonona hanao “eny” izahay na dia tena mavesatra aza izany fa io no lalana mankany amin'ny hasambarana fa “ao anatin'ny mangidy tokoa no misy ny mamy”. Md Josefa Ray Mpiaron'ny Eglizy eran-tany, ampianaro izahay hizotra amin'ny lalan'ny fahamarinana tsy misy olakolaka. Amen

Mompera Arseveka Mgr Benjamin Ramaroson